

Na osnovu člana 22 Statuta Brčko distrikta BiH (Službeni glasnik Brčko distrikta BiH, broj 17/08), Skupština Brčko distrikta BiH, na 17. redovnoj sjednici održanoj 3. decembra 2009. godine, usvaja

**Z A K O N**  
**O IZMJENAMA I DOPUNAMA ZAKONA O**  
**POLICIJSKIM SLUŽBENICIMA**  
**BRČKO DISTRIKTA BOSNE I HERCEGOVINE**

**Član 1**

U Zakonu o policijskim službenicima Brčko distrikta Bosne i Hercegovine (Službeni glasnik Brčko distrikta BiH, brojevi: 41/07 i 04/08) u članu 10 iza stava 1 dodaje se novi stav 2 koji glasi:

"(2) Ovlaštenja iz stava 1 ovog člana daju se u svrhu sprečavanja krivičnih djela i održavanja javnog reda i mira."

**Član 2**

Član 41 mijenja se i glasi:

**" Član 41**  
**Obrada ličnih podataka**

- (1) Policijski službenik, u skladu sa nadležnostima i ovlaštenjima određenim ovim zakonom, te u skladu s posebnim propisima, obrađuje informacije, uključujući i lične podatke.
- (2) Pri obradi ličnih podataka, policijski službenik postupa u skladu s odredbama Zakona o zaštiti ličnih podataka, osim ako ovim zakonom nije drugačije propisano."

**Član 3**

Iza člana 41 dodaju se novi članovi 41a, 41b, 41c, 41d i 41e koji glase:

**" Član 41a**  
**Obrada ličnih podataka u policijske svrhe**

- (1) Obrada ličnih podataka u policijske svrhe podrazumijeva obradu ličnih podataka koju vrši Policija radi sprečavanja i suzbijanja kriminala i održavanja javnog reda.
- (2) Pri obradi ličnih podataka u policijske svrhe, Policija je:

- a) dužna voditi evidenciju o svim zbirkama ličnih podataka i prijaviti ih Agenciji za zaštitu ličnih podataka, u skladu sa Zakonom o zaštiti ličnih podataka;
  - b) dužna podatke iz stava 1 ovog člana voditi odvojeno od drugih informacija;
  - c) ovlaštena, ukoliko je to potrebno u policijske svrhe, kombinovati lične podatke obrađivane za druge svrhe;
  - d) dužna ograničiti sakupljanje ličnih podataka koji se odnose na rasno porijeklo nosioca podataka, njegovo vjersko uvjerenje, seksualno opredjeljenje, političko mišljenje ili pripadnost određenim pokretima ili organizacijama koje nisu zabranjene zakonom. Sakupljanje ovih ličnih podataka može se sprovoditi samo ukoliko je to nužno za potrebe određene istrage;
  - e) dužna lične podatke označavati u pogledu stepena njihove tačnosti i pouzdanosti, a prije svega razlikovati lične podatke zasnovane na činjenicama od podataka zasnovanih na ličnim mišljenjima i procjenama;
  - f) dužna stalno i najmanje jednom u tri godine provjeravati da li su lični podaci potrebni za određene svrhe i nepotrebne podatke izbrisati.
- (3) Policija provjere iz stava 2 tačke f) ovog člana ne sprovodi u slučaju obrade ličnih podataka u svrhu osnovne identifikacije izvršioca krivičnih djela kao što su: evidencija otisaka prstiju, DNK i slično, kada se podaci brišu nakon isteka pet godina od dana smrti izvršioca.
- (4) Policija ne vrši provjeru i ne sprovodi brisanje u slučaju kada je lični podatak stavljen u dokumentaciju koja nije automatizovano vođena i kada se postupa prema pravilima arhivske službe.
- (5) Policija ne može vršiti obradu ličnih podataka preko obrađivača.
- (6) Za potrebe ispunjenja obaveze iz stavova 2, 3 i 4 ovoga člana, organi koji učestvuju u krivičnom postupku dužni su blagovremeno dati informacije o pravosnažnim odlukama i zastari krivičnog djela.

#### Član 41b **Korištenje ličnih podataka**

- (1) Lični podaci obrađeni u skladu s članom 41a ovog zakona koriste se ako je to:
- a) potrebno za izvršenje zadataka Policije;
  - b) potrebno za ispunjenje obaveza iz međunarodnog ugovora koji je zaključila BiH i za ispunjenje obaveza u sklopu međunarodne organizacije Interpol;
  - c) zakonom određeno;
  - d) u interesu nosioca podataka, ako je on dao saglasnost i ako je tu saglasnost moguće predvidjeti;
  - e) potrebno za izbjegavanje ozbiljne i neposredne opasnosti.

- (2) Lični podaci dostavljaju se na osnovu zahtjeva u kojem je potrebno navesti podatke o podnosiocu zahtjeva, o razlogu i svrsi za koju lični podaci trebaju biti predati.
- (3) Podaci se mogu dostaviti i bez zahtjeva ukoliko dostavljanje proizilazi iz zakona, međunarodnog ugovora ili se radi o dostavljanju za potrebe međunarodne organizacije Interpol, kao i u slučaju iz stava 1 tačke e) ovoga člana.
- (4) Ukoliko je moguće, Policija će pri svakom dostavljanju ličnih podataka dostaviti i informacije o pravosnažnim odlukama u vezi s krivičnim postupkom.
- (5) Neistiniti i netačni lični podaci ne mogu biti dostavljeni, a neprovjereni lični podaci moraju biti označeni prilikom predaje i mora biti navedena mjera njihove pouzdanosti.
- (6) Korisnik podataka nije ovlašten za obrađivanje ličnih podataka u drugu svrhu, osim za svrhu za koju su podaci bili dostavljeni.
- (7) Izuzetno od stava 6 ovoga člana, korisnik podataka može obrađivati lične podatke i u druge svrhe ako je ispunjen jedan od uslova iz stava 1 ovoga člana.

**Član 41c**  
**Prava nosioca podataka**

- (1) Policija ne dostavlja informaciju nosiocu podataka ukoliko bi moglo doći do:
  - a) ugrožavanja izvršenja zadataka Policije u vezi s krivičnim postupkom ili
  - b) ugrožavanja interesa trećeg lica.
- (2) U slučaju neispunjenosti uslova iz stava 1 ovoga člana ili u slučaju brisanja ličnih podataka, Policija donosi odluku koju pismeno obrazlaže.
- (3) Ukoliko Policija ne obrađuje lične podatke koji se odnose na podnosioca zahtjeva ili, ukoliko bi s obrazloženjem odluke o odbijanju zahtjeva moglo doći do ugrožavanja izvršenja zadataka Policije, podnosilac zahtjeva bit će obaviješten o tome da Policija ne obrađuje lične podatke podnosioca zahtjeva.
- (4) Ukoliko je Policija dobila lične podatke bez znanja nosioca podataka, a koji se dalje obrađuju, potrebno je da o tome obavijesti nosioca podataka i u slučaju ako to ne može ugroziti izvršenje policijskog zadatka ili ugroziti interese trećih lica.

**Član 41d**  
**Obrada ličnih podataka umrlih**

- (1) Pod ličnim podacima smatraju se i podaci koji se odnose na umrla lica.
- (2) Prava nosioca podataka umrlih lica izvršavaju se posredstvom nasljednika.

Član 41e  
**Objavljivanje ličnih podataka**

- (1) Policija je ovlaštena za objavljivanje ličnih podataka u potrebnom obimu ukoliko je to potrebno za potrebe obezbjeđivanja identiteta lica i potrage za traženim licima i stvarima.
- (2) Obrada ličnih podataka u skladu sa ovim zakonom, ne podliježe obavezama propisanim Zakonom o slobodi pristupa informacijama."

**Član 4**

- (1) U članu 58, stavu 1 iza riječi "izbor" dodaje se zarez "(,)" i riječi "za svaki raspisani oglas".
- (2) U stavu 2, iza riječi "Brčko distrikta BiH" dodaje se zarez "(,)" i riječi "koji imaju VII stepen stručne spreme i tri godine radnog iskustva, od kojih je najmanje jedan diplomirani pravnik".
- (3) Iza stava 4 dodaje se novi stav 5 koji glasi:  
"(5) Poslovnik o radu Komisije za izbor donosi šef Policije."

**Član 5**

U članu 61, stavu 1 riječi "30 (trideset)" zamjenjuju se riječima "60".

**Član 6**

Član 70 mijenja se i glasi:

"Član 70  
**Probni rad**

- (1) Nakon stupanja na dužnost, kadet raspoređen na radno mjesto policijskog službenika u činu policajca ili mlađeg inspektora na probnom je radu.
- (2) Probni rad traje 12 mjeseci i obuhvata uvođenje u posao i rad sa svim redovnim policijskim dužnostima i odgovornostima.
- (3) Policijskom službeniku iz stava 1 ovoga člana određuje se starješina – mentor.
- (4) Mentor iz stava 3 ovog člana je neposredno nadređeni koji je predsjednik komisije koja vrši ocjenjivanje probnog rada.

**Član 7**

U članu 83, stavu 3 iza riječi "uzima u obzir" dodaju se riječi "kao otežavajuću okolnost".

### **Član 8**

U članu 88, stavu 4 iza riječi "šef Policije" dodaje se zarez "(,)" i riječi "na prijedlog zamjenika šefa Policije".

### **Član 9**

U članu 95, stav 4 mijenja se i glasi:

"(4) Uz dodatak iz stava 3 ovog člana u posebnim okolnostima i na prijedlog šefa Policije Vlada određuje veći trajni dodatak za pojedina radna mjesta, u iznosu 10% osnovne plate."

### **Član 10**

U članu 97 iza stava 1 dodaje se novi stav 2 koji glasi:

"(2) Dodatak za posebne uslove rada isplaćuje se policijskim službenicima za vrijeme trajanja plaćenog odsustva, godišnjeg odmora i bolovanja."

### **Član 11**

U članu 101 iza stava 1 dodaju se novi stavovi 2, 3 i 4 koji glase:

"(2) Policijski službenik koji izgubi život na dužnosti sahranjuje se na trošak Policije na mjestu koje odredi njegova porodica.

(3) Policija snosi sljedeće posmrtno troškove:

- a) troškove za prevoz posmrtnih ostataka na mjesto sahrane;
- b) putne troškove za dva prateća lica;
- c) trošak za grobnicu ako nije već osigurana na drugi način;
- d) druge uobičajene troškove u iznosu koji određuje šef Policije.

(4) Porodica koju je preminuli policijski službenik iz stava 2 ovog zakona izdržavao ima pravo na jednokratnu finansijsku pomoć u iznosu posljednje neto plate koju je primio preminuli uvećane šest puta."

### **Član 12**

Član 102 se mijenja i glasi:

**"Član 102  
Otpremnina prilikom odlaska u penziju**

Policijskom službeniku se isplaćuje otpremnina prilikom odlaska u penziju u iznosu posljednje plate policijskog službenika uvećane za šest puta ili šestostrukom iznosu posljednje prosječne plate u organima Brčko distrikta BiH, ukoliko je to povoljnije za policijskog službenika."

**Član 13**

U članu 138, stavu 3 iza riječi "ovog zakona" dodaje se zarez "(,)" i riječi "ukoliko je to povoljnije za policijskog službenika u odnosu na iznos plate iz stava 1 ovog člana".

**Član 14**

U članu 142, stavu 1 iza tačke j) dodaje se nova tačka k) koja glasi:

" k) smrti policijskog službenika."

**Član 15**

U članu 151, stavu 1 tekst "do 31. 7. 2008. godine" zamjenjuju se tekstem "do 31. 12. 2010. godine".

**Član 16**

U članu 157, stavu 2 iza tačke h) briše se tačka "(.)", dodaje tačka-zarez "(;)" i nova tačka i) koja glasi:

" i) o većem trajnom dodatku policijskih službenika."

**Član 17**

(1) U članu 158, stavu 1 iza tačke i) dodaje se nova tačka j) koja glasi:

"j) radu Komisije za izbor u skladu s članom 58, stavom (5)."

(2) Dosadašnje tačke j), k), l), m), n), o) i p) postaju tačke k), l), m), n), o), p) i r).

**Član 18**

Iza člana 158 dodaju se novi članovi 158a i 158b koji glase:

**"Član 158a  
Propisi**

Podzakonski akti koji su na snazi usaglašavaju se sa odredbama ovog zakona u roku od 3 mjeseca od dana njegovog stupanja na snagu.

**Član 158 b**

## **Primjena zakona**

Članovi 9 i 12 ovog zakona primjenjivat će se kad se u budžetu Distrikta obezbijede sredstva, a najkasnije od 1. 1. 2011. godine. "

## **Član 19 Stupanje na snagu**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-161/09  
Brčko, 3. decembra 2009. godine

**PREDSJEDNIK  
SKUPŠTINE BRČKO DISTRIKTA BiH**

**Mirsad Đapo, dipl. pravnik, s.r.**